

МЕСЯЦА ИУЛЛИЯ В 27 ДЕНЬ.

**СВЯТАГО ВЕЛИКОМУЧЕНИКА И ЦЕЛИТЕЛЯ ПАНТЕЛЕЙМОНА
НА ВЕЛИЦЕЙ ВЕЧЕРНИ**

Поем, Блажен муж, 1-й антифон

На Господи возвах, стихиры на 6, глас 4.

Подобен: Званный свыше:

Иже по достоянию зван быв Пантелеймон, / егда человеколюбное всем простерл еси душ попечение, / и телес исцеление показуя: / тогда тезоименным званием обогатился еси, / добродетели воздаяние, и благочестия возмездие мучениче обрет, / венценосец и непобедим воин явлься Христа Бога нашего: / Егоже моли спасти и просветити души наша.

Иже от невещественных источник Спасителя, / божественных исцелений присно благодать почерпая, / и богато изливая, и подавая приступающим к тебе, / всеблаженне, всех славное твое и всесвященное, / и светоносное торжество верно совершающих, / благодатию Божественною сих озари, / богоподобным помазан именованием, / яве и благостию: / ейже моли всем дароватися, поющим тя.

Муками многими искусися твоя ныне огнепальная любовь, / ко еже сущему желанию, / морем и огнем завистно борим. / Темже злоначальнаго испроверг, / живоносное действо Утешителя яве прият богатодательное. / Еюже и жива преславно / умершаго богомудре показал еси, / и различная исцеления соделал еси, преблаженне.

Ины стихиры, глас 2. Самогласны:

Анатолиево: Безмездно благодать даеши человеком, / Пантелеймоне мучениче славне: / и духи отгониши призыванием Христовым, / и слепым видети даруеши, / яко Того угодник искренний: / но моли, врачу всеблаженне, / даровати миру мир тверд, / и тя любящим велию милость.

Матере благочестивыя возжелал еси веру, / отчее исправил еси нечестие, / Ермолаа бо утвердился учении, / сим и крещение совершил еси, / Пантелеймоне мучениче славне: / Милостиваго Бога, недугующих врачу и страстей отгонителю, / моли избавитися от напастей, / верою творящим пречестную память твою.

Отринул еси прелесть отца, всеславне, / и словеса матерня смысленно приемь, / паче злата плод принесл еси, / по Господню гласу, и врач изряден явился еси, / Пантелеимоне мучениче славне: / шествуя же благодати путем, / обрел еси лежаща низу младенца, / ехидною угрызена, / и к Богу молитву сотворив и прилежно помолвився, / абие отрока воскресил еси / и зверя растерзал еси. / Темже поминай нас верою творящих твою память, / яко да обрящем милость в День Судный.

Слава, глас 6. Византиево:

Возсия днесь честная память безсребренника, / верная созывающи на трапезу тайную, / и к торжеству празднственному / водяши празднлюбных составления: / наста бо ныне нам чудодейственный врач, / недуги всем исцеляяй, / Пантелеймон твердый страдалец, / и молится прилежно Господеви, / спастися душам нашим.

И ныне. Богородичен:

Кто Тебе не ублажит, Пресвятая Дево; / кто ли не воспоет Твоего Пречистаго Рождества; / безлетно бо от Отца Возсиявый Сын Единородный, / Тойже от Тебе, Чистыя, пройде, / неизреченно воплощя: / естеством Бог сый, / и естеством быв Человек нас ради, / не во двою лицу Разделяемый, / но во Двою Естеству / неслитно Познаваемый. / Того моли, Чистая, Всеблаженная, / помиловатися душам нашим.

Вход. Прокимен дне и чтения три.

На стиховне стихиры, глас 1-й:

Добляго страдальца Пантелеимона, / по благочестии подвизавшася, приидите, / людие, воспоим глаголюще: / радуйся, твердый веры поборниче по пророцех и апостолах, / радуйся, Христа в себе имевый, подобяся делу Павлу, / радуйся, плавающим небурное пристанище, / радуйся, наше похвало и церкви верных радование.

Стих: Праведник яко финикс процветет, и яко кедр, иже в Ливане умножится.

От младенчества добрую стезю обрет, / милостию Христовою помазав сердце, / болезни целиши просящим усердно, / отнюдуже и умершего воздвигл еси молитвами твоими, / и восприял еси небесное царствие, / Пантелеймоне всеблаженне.

Стих: Насаждени в дому Господни, во дворех Бога нашего процветут.

Стратотерпца Христова похвалим, / мудрого Пантелеимона, / иже змия уби силою крестною, / и молитвами Ермолаевыми отрока воскреси, / и несвященныя посрами мудрости словеса, / иже и молится непрестанно, / всем подати согрешений прощение.

Ины стихиры, поемья в Русской обители святого великомученика Пантелеимона на Афоне, глас 5:

Радуйся, Пантелеимоне мудре, / матернее возлюбивый благочестие, / отца же нечестие возненавидевый / и ко благочестию богомудрыми сего наставивый увещании, / священнейшим Ермолаем научен вере совершеннейше, / угрызенна же ехидною / и умерщвена отрока молитвою твоею воздвигнувший, / змия видимаго растерзав и невидимаго, / Христа моли, чудодейственниче, / даровати нам велию милость.

Стих: Праведник яко финикс процветет, и яко кедр, иже в Ливане умножится.

Радуйся, Пантелеимоне тверде, / доблемудрственне представый судящему, / и пред сим велегласно Христа исповедавый, / и Бога Истиннаго, треблаженне, / никакоже устрашася страшных орудий мучения, / но претерпев мужественне биения, / опаления же и строгания, / кипящее олово и всеокрушительное коло, / борение со зверьми и водою, / божественныя же главы усечение, / дерзновение убо имея ко Господу, / Тому, великомучениче, / молися даровати нам велию милость.

Стих: Насаждени в дому Господни, во дворех Бога нашего процветут.

Радуйся, Пантелеимоне благосерде, / с Небесе по достоянию приемый от Всемиловитаго Спаса / именованне всемиловитаго, / еже уверяеши дела воистнну, / всех милуя, к тебе притекающих, / врачу скорый недугующих, / исцелений реко приснотекущая, / источниче чудес неисчерпаемый, / мучеников похвало, безсребренников славо, / Христу молися, целебниче, / даровати велию милость.

Слава, глас 8. Византиево:

Матернее возлюбив благочестие, / отчим же безбожием возгнушався, / Врачу душ воин быв, врачевне себе наказал еси: / и божественную благодатию во обоих благоискусен, / страстей всегубитель, и душ врач показался еси: / но якоже в страданиях твердое, / и в молитвах приснопробывательное стяжав, / Пантелеимоне мучениче Христов, / прилежно моли спастися душам нашим.

И ныне, Богородичен:

Безвестная Дево, / Яже Бога неизреченно заченши плотию, / Мати Бога Вышняго, / Твоих рабов мольбы прими, Всенепорочная, / всем подающи очищение прегрешений: / ныне наша моления приемлющи, / моли спастися всем нам.

Тропарь. глас 3-й.

Страстотерпче святой и целебниче Пантелеимоне, / моли Милостиваго Бога, / да прегрешений оставление / подаст душам нашим.

Слава, и ныне, Богородичен:

Тя, ходатайствовавшую спасение рода нашего, / воспеваем, Богородице Дево, / плотию бо от Тебе восприятою Сын Твой и Бог наш, / крестом восприим страсть, / избави нас от тли, яко Человеколюбец.

На утрени

По 1-й стихологии седален, глас 1:

Матернее благочестие соблюл еси, блаженне, / отчее же нечестие благочестно исправил еси, / сего ради и благодать приял еси / от Бога Вседержителя, / врачевати немощствующих болезни, / мучениче славне Пантелеимоне, / всех с верою и любовию к тебе прибегающих.

Слава, и ныне, Богородичен:

Надеждо христиан, Всесвятая Дево, / Егоже родила еси Бога, / паче ума и слова, / непрестано моли с Небесными силами / даровати отпущение согрешений всем нам / и исправление жития, / верою и любовию Тя славящим.

По 2-й стихологии седален, глас 4:

Яко воина Христова непобедимаго / и борца мужественнейшаго, / тя вси вернии восхваляем, / мучеников доброту, / верою празднующе святую память твою, / мучениче всехвальне. / Честныя же подвиги согласно славословим, / мудре, и Спасителя Христа величаем.

Слава:

Пострадал еси мужественне за Христа, / и веру проведав отцу твоему, извлекл еси того, всехвальне, / из рова нечестия, и мучителей не убоявся / безбожнаго умышления, / демонов посрамил еси безсильную дерзость. / Сего ради благодать от Христа стяжал еси / врачевати недуги изгнати духи вражия. / Пантелеимоне всехвальне, / молися Христу Богу / прегрешений оставление даровати, / празднующим любовию святую память твою.

И ныне, Богородичен:

Родила еси неизреченно Бога, / прежде век от Отца возсиявшаго, / и в последняя времена от чрева Твоего, / Богородице, явльшагося. / Свет во откровение языков и спасение всего мира, / в просвещение во тьме / сидящим и утешение верою поющим Тя. / Сего убо моли просветити мя, / Владычице, светом разума, / и подати сердцу моему умиление, / да омью слезами грехи моя.

Величание:

Величаем тя, страстотерпче святой, великомучениче и целebниче Пантелеимоне, и чтим честная страдания твоя, яже за Христа претепел еси.

Псалом избранный: Бог нам прибежище и сила:

По полиелеи седален, глас 4:

Торжествуют днесь собори верных, / честныя подвиги твоя, / Пантелеимоне страстотерпче, / прославляюще Животодавца, / явившаго тебе крепкаго нам предстателя.

Слава, и ныне, Богородичен:

Матерь Божию Тя свемы вси, / Деву воистинну и по Рождестве явльшуся, / любовию притекающи к Твоей благодати: / Тебе бо имамы, грешнии, Предстательницу, / Тебе стяжахом в напастех спасение, / Едину Всенепорочную.

Степенна, глас 4. Антифон 1-й, ихже стихи повторяюще поем:

От юности моя / мнози борют мя страсти, / но Сам мя заступи, / и спаси Спасе мой.

Ненавидящи Сиона, / посрамитесь от Господа, / яко трава бо огнем / будете изсохше.

Слава и ныне: / Святым Духом / всяка душа живится, / и чистотою возвышается, / светлеется Троическим Единством священнотайне.

Прокимен, глас 4:

Прокимен: Праведник, яко финикс процветет, * и яко кедр, иже в Ливане, умножится.

Стих: Насаждени в дому Господни, во дворех Бога нашего процветут.

Всякое дыхание:

Евангелие от Луки, зачало 106.

По 50-м псалме стихира, глас 2:

Милостиваго Христа, / Пантелеимоне, моли ныне, / врачу Божий, / избавити мя страстей и помиловати мя.

Стихира самогласна, глас 2:

Возсия днесь славная память твоя, / Пантелеимоне многострадальне, / созывающи нас, празднлюбцев, / на хвалу и славу Христу Богу нашему, / в тебе источник чудес нам явльшему, / тем, притекающе к раце мощей твоих, / исцелений дарования приемлем, / венчавшаго тебе Спаса Христа / воспевающе во веки, / непрестанно славяще.

Канон Богородицы со ирмосом на 6 и святого два канона на 8.

Канон первый, глас 2, егоже краегранесие: Пантелеимона, изряднаго мученика, пою. Творение Феофаново.

Песнь 1.

Ирмос: Во глубине постла иногда / фараонистское всевоинство преоруженная сила, / воплощенное же Слово всезлбный грех потребило есть, / препрославленный Господь, / славно бо прославися.

Приступль усердно ко Христу, прежде скончания еже о Христе, мертвеца первее воздвигл еси. Ныне же мя, пребогате, умерщвена греховным угрызением, твоими молитвами, о Пантелеимоне, оживотвори.

Возсия, якоже звезда, нося в юности старостный и богомудрый разум, добротою же тела благолепие души стяжав, Препрославленному Слову явился еси прекрасен.

Умертвився міру, и во Христа, блаженне, одеаяся банею Крещения, бысть богоносен орган, и приятелище действия Духу, всем угождая, всех уврачуя недуги.

Премудрость сестру себе притворив, и причастник жизни ведом, от нея почтился еси и венцем дарований украсился еси, Божественныя зари, блаженне, облистая светлостію.

Богородичен: Благословенными, Пресвятая Чистая, естество, удалено преслушанием бывшее от Зиждителя, Христа рождши, венчала еси, и тления свободила еси. Темже радуешься, вси вернии Тя ублажаем.

**Ин канон, поемый в Русской обители святого великомученика
Пантелеимона на Афоне. Глас 4.**

Песнь 1.

Ирмос: Отверзу уста моя, / и наполнятся Духа, / и слово отрыгну Царице Матери, / и явлюся, светло торжествуя, / и воспою, радуясь, Тоя чудеса.

С Моисеем славным и Мариам Богомудрою днесь не глубину чермную, но море преходяще доблестей и чудес великаго в мученицех, того воспоим, радуешься.

Закон похвалений побеждается светлостію нрава твоего и подвигов величеством, Един Христос достойно славити тя весть Божественною у Себе светлостію.

Днесь празднует Никомидия и сия обитель твоя, Пантелеимоне, всякому граду и обители верных спразднующим память твою и о тебе Пресвятую Троицу величающим.

Богородичен: Свет Рождшая Божественный и невечерний, души моя зеницы просвети, Приснодево, пети Тя со светлым в страсотерпцех целителем нашим, Всепетая.

Песнь 3.

Ирмос: Процвела есть пустыня, яко крин, Господи, / языческая неплодящая церковь пришествием Твоим, / в нейже утвердися мое сердце.

Словеса Духа услышав, был еси яко земля добрая и благоплодная, приемши семя многоценно, и родивый, треблаженне, спасение душам.

Умертвил еси мудрование змиина угрызения, и душу оживил еси, богодухновенно возродився и Царю всех предстоя.

Посрамил еси безбожное мучителей повеление, и ко Христу притекл еси, вместо всех Сего стяжав, и был еси, богомудре, великий купец.

Матере твоя благочестие возлюбль, славне, отчее же возненавидел еси безбожие многомятежное, яко имея разум, лучшее избрал еси.

Богородичен: Носяй Божественным мановением всю тварь Господь, на руку носится Твоею, Дево. Егоже ныне моли, избавити от бед поющыя Тя.

Ин.

Ирмос: Твоя песнословцы, Богородице, / живой и независтный Источниче, / лик себе совокупльшия духовно утверди, / в Божественней Твоей славе / венцев славы сподоби.

Презрев красная міра, красен, яко шипок, явился еси, всеизрядне, утвердившу ти сердце свое в любви Христа, желаний Края.

Матере твоя благочестие возлюбль, славне, возненавидел еси злочестие отца, яко пагубное, и того ко благочестию Богомудро привел еси.

Тобою, Пантелеимоне, пославися Господь, во Святей Троице Славимый, на Небеси прославив тя и на земли славну творя память твою.

Богородичен: Молитвами милости тезоименитаго мученика низпосли нам, Госпоже, Божественную милость от Воплотившагося из Тебе милости ради.

Седален, глас 4:

Добляго страдальца благочестия Христова / восхвалим светло Пантелеимона, / вернии, псалмы и пении и песнями духовными, / имже мучительство невидимаго врага / силою Божественною попрося / и недугов исцеление богатно / от Господа даровася / творящим верно / Божественный и честный праздник его.

Слава, глас тойже:

Ермолая мудраго, мучениче, / словеса послушал еси и оставил еси / абие художество земное, / яко мерзко, яко некрепко, / яко губительно, имея Христовы страсти, / учения жизни в сердце твоём, / неисцельно страждущим здравие, / Пантелеимоне, даруя. / Темже молися о творящих любовию память твою.

И ныне, Богородичен:

Треволнении страстными, безсовестный обуреваемъ, / Чистая, призваю Тя тепле: / да не презриши мене, окаяннаго, погибнути, / бездну милосердия рождши, / разве бо Тебе надежды не имам, / да не врагом убо обрадование и смех, / надеявся на Тя, явлюся, / ибо можещи, елико хочещи, / яко Мати сущи всех Бога.

Песнь 4.

Ирмос: Пришел еси от Девы, / не ходатай, ни ангел, / но Сам, Господи, воплощься, / и спасл еси всего мя человека. / Тем зову Ти: / слава силе Твоей, Господи.

Последуя Владыце любовию, расточил еси богатство нищим, себе обнажая к страданию, еже и прошел еси, вечныя надежды провидев.

Хваления Богу жертву принесл еси, яве возгнушався идольских треб, все же шатание нечестивых, страсотерпче, поправ еси.

Снедаемым завистию, и гневом боримым, непоборимую силу сим представил еси, мучениче, и победил еси злочестивое томление вооружився.

Иже старца Симеона рукама Держимый, старца тя глаголы, Пантелеимоне, улови к Божественному разумению, и ко многих спасению и избавлению.

Богородичен: Юныя и девы во вслед Тебе потекоша, Деву и Отроковицу Тя и Матерь знающе. Едина бо обоя во едино собрала еси, несказанно Богоневесто.

Ин.

Ирмос: Незследный Божий Совет, / еже от Девы воплощения Тебе, Вышняго, / пророк Аввакум усмотря, зовяше: / слава силе Твоей, Господи.

Хотяй всем спасения и истины познания Ермолая тя глаголы, Богоизбранне, улови к Божественному разумению и ко многих спасению.

Яко Иосиф прекрасный, в цвете юности благочестия, и разума, и милосердия ко всем исполнился еси, благоугождая Вышнему и зовя: слава силе Твоей, Господи.

Яко имея дерзновение к Богу Триипостасному, мирная и премирная благая проси почитающим тя, великомучениче, и о тебе зовущим: слава силе Твоей, Господи.

Богородичен: Воистинну паче ума есть воплощение от Тебе, Пречистая, Сына Божия, в Негоже уверовав от сердца, Пантелеимон зываше: слава силе Твоей, Господи.

Песнь 5.

Ирмос: Просвещение во тьме лежащих, / спасение отчаянных, Христе Спасе мой, / к Тебе утренюю, Царю мира, / просвети мя сиянием Твоим, / иного бо разве Тебе бога не знаю.

Радостно подвиги подъял еси мучения, огражден силою Божественною и терпением, твердо мучения подъемля, радуясь вопиял еси: иного бо разве Тебе Бога не знаем.

На подвиг борьбы вступив, блаженне, Божественною силою превозмогл еси безбожных нечестивое тиранство и неистовство идолослужения, облекся во Христа, Судию и Венчателю подвигов.

Юношеско ты противление имея, и твердостью души возставление стяжав, всяку язву доблественне претерпел еси, и мужеским, блаженне, умом, благодатию Божественнаго Креста укрепляемь.

Несогласное отринув вещание заблуждших, Небесным учением, страдалец и многим спасению преславно бысть виновник, Твоим действием, Христе укрепляемь.

Богородичен: Речения премудрых и гадания вся, Препрославленная, и пророк проречения, Тя проображаю, проявленно напоследок быти Божию Родительницу, иныя бо разве Тебе чистыя не знаем.

Ин.

Ирмос: Ужасошася всяческая / о Божественной славе Твоей: / Ты бо, Неискусобрачная Дево, / имела еси во утробе над всеми Бога / и родила еси Безлетнаго Сына, / всем, воспевающим Тя / мир подавающая.

Делы уверитися хотя в вере, в нейже от Ермолая освящен был еси, яко, узрев же отроча мертво, молитвою твоею воздвигл еси того, досточудне, змия же умертвил еси.

Неизцельныя страсти единым Христа призыванием исцеляюще тебе, слепаго просветил еси, трблаженне, прежде светлаго твоего страдальчества твердость показуя веры.

Неможения душ и телес свободы рабы Твоя, Троице Единосущная, и сохрани ны, поврежденны от искушений и помраченны страстьми, Пантелеимона предстательством.

Богородичен: Необоримый Покров Твой, Владычице, и заступление ублажаемого нами великомученика да будут присно с нами, спасающе нас от всякаго навета враг видимых и невидимых.

Песнь 6.

Ирмос: В бездне греховней валяся, / неизследную милосердия Твоего призываю бездну: / от тли, Боже, мя возведи.

Идолы лестныя оплевал еси, и возносимую прелесть упразднил еси, чудодействуя дивная, и творя исцеления, Богомудре.

Венечник показася всеизрядне, сквозе бо огонь ты прошел еси и воду, и на колеси протязаемь, преславно погубил еси безумныя.

Мучителей суровство низложив, неудобь носимая биения телесная душевною крепостию, пострадал еси, Богомудре, благодатию.

Богородичен: Содержай концы земли яко Бог, Твоима руками, Чистая, держится, описанием тела, Иже Божественным зраком не описанный.

Ин.

Ирмос: Божественное сие и всечестное / совершающе празднество, / Богомудрии, Богоматере, / приидите, руками восплещим, / от Нея Рождшагося Бога славим.

Слепаго зрение телесное и душевное показа того мученика тверда, тебе же, святе, чудодейственника и начало подвигов твоих за Христа, ихже доблественно совершил еси.

Мечем мужества твоего, доблемудре, разсекл еси мучителей коварства, прещения же и всякое на тя шатание, и змия льстивомудреннаго главу сокрушил еси.

Словесы и деянии идольскую лесть обличая, привел еси ко Свету Трисолнечнаго Богоначалия многия никомедийцы, Пантелеимоне Богосветле.

Богородичен: Твое достояние, Слове, неборимо яви, православным людем победы подая на враги, молитвами Богородицы и Твоего победоносного мученика.

Кондак, глас 5-й:

Подражатель сый Милостиваго, / и исцелений благодать от Него прием, / страстотерпче и мучениче Христа Бога, / молитвами Твоими душевныя наша недуги исцели, / отгоняя присно борца соблазны от вопиющих верно: / спаси ны, Господи.

Икос: Безребренника память, добляго страдальца, вернаго целebника, благочестно воспоем, христороубцы, да приимем милость, паче же оскверншии, якоже и аз, своя храмы, душам бо и телом, возлюбленнии, исцеления подавает. Потщимся убо, верная братия, в сердцах наших имети его крепость, избавляюща от лести вопиющия: спаси ны, Господи.

Песнь 7.

Ирмос: Телу златому премудрыя дети не послужиша, / и в пламень сами поидоша, / и боги их обругаша, / среди пламене возопиша и ороси я Ангел: / услышася уже уст ваших молитва.

Законно стражда, и победив врага, пристанище благоутишно сущим в мори, славне, обуреваемым был еси, свет же сущим во тьме жития, и пети научил еси: благословен Бог отец наших.

Блажен еси и добро тебе есть ныне, преблаженне, восприимшему пребогатую и блаженную надежду твою, уготованную верою Господеви зовущим: благословен Бог отец наших.

Святых души, и праведных лица, и безплотных чин ангельский прият, сликовника тя, блаженне, мечем бо усечен быв во главу, поеши радуяся: благословен Бог отец наших.

Богородичен: Оружие еже прежде древа животнаго, нас отлучившее, ныне обращаемо приемлет, знаменавшыяся Кровию, из ребр Сына Твоего изшедшею, Пренепорочная. Благословена еси, Бога плотию рождышая.

Ин.

Ирмос: Не послужиша твари Богомудрии / паче Создавшаго, / но, огненное прещение мужески поправше, / радовахуся, поюще: / препетый отцев Господь и Бог, благословен еси.

Да покажется делы вера, взывал еси, славне, пред одром разслабленнаго, и Кого призыванием сей абие воздвизается, Той есть отцев Бог благословенный.

Постыжен бысть зело Максимиан, зря о Имени Христове ходяща разслабленнаго, не имея же, что провещати, по ласкательствах мукам предает тя, поюща: препетый отцев Боже, благословен еси.

Тебе, непобедиме, в коноб с кипящим оловом мучитель вверже, но явлейся ти Господь огонь убо угаси, олово же устудив, пети ты возбуди: Триипостасный отцев Боже, благословен еси.

Богородичен: Глас Тебе радостно приносим, Богоневесто, радуйся, зовуще, Помощнице верных и мучеников Утверждение, Сыну Твоему зовуще: Препетый отцев Боже, благословен еси.

Песнь 8.

Ирмос: В пещь огненну ко отроком еврейским снизшедшаго / и пламень в росу предложшаго Бога / пойте, дела, яко Господа, / и превозносите во вся веки.

Благоприятное твоя хитрости, душевное ослепление отчее исцеляет, подающее свет верою, преблаженне, притекающим, и ко Спасу Христу наставляющее.

За Христа заклан быв, к вечней жизни преминал еси, и Богозванен явися, именованием Божиим, богомудре. Тем почитаем тя, и превозносим Христа во веки.

Витийское отложив лютое мудрец глумление, Христовым призыванием, болезненных страстей корения посекаеши, исцеляя превозносящия Христа во веки.

Богородичен: Безсмертия зарю вемы источника Тя, Богородице, яко Рождшую Слова Безсмертнаго Отца, всех смерти избавляющаго, превозносящих Его во веки.

Ин.

Ирмос: Отроки благочестивыя в пещи / Рождество Богородичо спасло есть: / тогда убо образуемое, ныне же действующее, / вселенную всю воздвизает пети Тебе: / Господа пойте, дела, / и превозносите Его во вся веки.

Тяжкий камень на твою выю привязаша и в море ты ввергоша нечестивии, но камень, аки лист, по водам плаваше, руководством же странным суше отдаешися ты, всечестне.

Зверем кровожадным лютейший зверей вдеде ты, страстотерпче, паки же к Тебе Господь дивен явися, звери украти и сих состязатися сотвори, кто бы из них первый поклонился тебе и твоя ноги облобыза, прехвальне.

Множества уверовавших видя, царь возъярися паче и вся звери повеле убити, тебе же, великомучениче, заключити в темницу, Троицу во Единице поюща: Господа пойте, дела, и превозносите Его во вся веки.

Богородичен: Не пременив естества Иисус, из Тебе бо во всего человека облечися, Богородительнице, Егоже страсть Пантелеимон крепче изобразив, радуяся, поет Тому: Господа пойте, дела, и превозносите Его во вся веки.

Песнь 9.

Ирмос: Безначальна Родителя Сын, Бог и Господь, / воплощся от Девы, нам явися, / омраченная просветити, собрати расточенная. / Тем Всепетую Богородицу / величаем.

Преставился еси, радуясь, к желанию конечному, идеже вселився, преблаженне, блаженный конец прияти воистинну сподобился еси, сый со Владыкою твоим во веки безконечныя.

Желание получил еси, и любви твоя исполнение, каплющей еще теплой крови, за Христа изливавшейся, от Негоже, радуясь, приял еси венцы подвигов твоих.

Львов уста, и зверей зияния, якоже Даниил древле ты обуздал еси, весть бо стыдетися, мучениче, добродетели и безсловесное естество. Темже тя преславне, сошедшеся уболажаем.

Богатную благодать тебе Христос дарует, сокровищ исцелений нам даруя, и всемилостива изволением тя подав всякому скорбящему, и пристанище тихое, и предстателя, и защитителя.

Богородичен: Яко руно, Всенепорочная, дождь Небесный во утробе заченши, нам родила еси тишину Дающего, яко Бога Того поющим и Тя, Всепетую Богородицу проповедающим.

Ин.

Ирмос: Всяк земнородный / да възиграется, Духом просвещаемь, / да торжествует же Безплотных умов естество, / почитающее священное торжество Богоматере, / и да вопиет: / Радуйся, Всеблаженная / Богородице, Чистая Приснодево.

К колеси привязанный, дивен был еси, досточудне, безумныя бо тое паче погуби, бити убо ты повеле Максимиан и отсеци главу твою, мечу же прегнувшемуся, спекулятора и воины к вере во Христа обратил еси.

О убийцах и о всем мире молившуся ти, славне, свыше по достоянию наречен был еси Пантелеимон, дела оправдая именование, млеко же истече из тебе вместо крове, и тако, венценосный, Христу предстал еси.

Свыше назираеши, великомучениче, память твою любовию совершающих и ходатайствуеши тем у Трисолнечнаго Божества грехов прощение, мир же и спасение, еже и нам проси, ты величающим.

Богородичен: Светло исповеда победоносный Пантелеимон всех Владыку из Твоя, Благодатная, Возсиявша утробы, твердо испи за Того чашу страдания и утешение прия с веселием, ликуя с мученики и всеми святыми.

Светилен:

Подобен: Учеником

Милостивую твою душу провиде Бог, Пантелеимона ты проповеда, безсребренно бо требующим исцеление источаеши, святе, мучителей свирепство терпением твоим победивый.

Слава, и ныне:

Пантелеимоне всеумдре, честных безсребренников священная красото, и Божественных мучеников великопобедная славо, свыше победы испроси православным и миру мир, и верно славящим ты, святе, спасение, с Богородицею о всех моляся.

На хвалитех, стихиры на 4, глас 8

Подобен: О преславного чудесе:

Дело помышления Вышняго, / еже на тебе бывшее, / светло показася, телесныя бо страсти целити явственню, / Пантелеимоне, / научаемь, душ обрелся еси врач изряден, / словом благодати уврачуя вся и мрачныя лести избавляя / к тебе притекающия.

Милости Божия подобяся, / Пантелеимон яве именовася, / сугубо прием имя и подобное вещи. / Яко сострадателен бо, милуеши всех, / сугубо подавая сим исцеление, / питая и целя, и к разуму, славне, / наставляя Божественному / и пресветлому Христову, пребогате.

Добротою, богомудре, / телесною душевною доброту благодушно пременил еси / и умное благолепие плотскою красотою, / и зрящия, мучениче, удивил еси, / знаменьми сияя и чудесы, / цветом юности, состаревшихся разум прием, / верою же и благодатию просвещаемь.

Глас 5, самогласен, Германово:

Всесветлая мученика память сияет, / яко солнце, / концем, и непрестанно подавает верным исцеления, / недуги отгоняющи и страсти исцеляющи, / молится бо присно Пантелеимон / Христу даровати душам нашим / велию милость.

Слава, глас 4, Византиево:

Днесь просия страстоносца память, / приидите, вернии, духовно возвеселимся, / и песньми сего венчаем, / ибо невидимаго врага силою крестною мужески победил есть, / и, мучителей безмерных мук не убоявся, / законно почесть прият Вышняго звания, / и ныне со ангелы вечно почивает. / Но, о мучениче Христов Пантелеимоне, / врачу недугующих и пристанище обуреваемых, / не престай моляся Милостивому Богу / спастися душам нашим.

И ныне, Богородичен, глас тойже:

Богородицу песньми немолчными / благочестно поем, вопиюще: / радуйся, Горо святая, / радуйся, Престоле огненосный всех Царя, / радуйся, Похвало Ангелов / и святых Славо.

НА ЛИТУРГИИ

Блаженны от канона святого, песни 3-я и 6-я.

1. Презрев красная міра, красен, яко шипок, явился еси, всеизрядне, утвердившу ти сердце свое в любви Христа, желаний Края.
2. Матере твояа благочестие возлюбль, славне, возненавидел еси злочестие отца, яко пагубное, и того ко благочестию Богомудро привел еси.
3. Тобою, Пантелеимоне, пославися Господь, во Святей Троице Славимый, на Небеси прославив тя и на земли славу твою творя память твою.
4. Слепаго зрение телесное и душевное показа того мученика тверда, тебе же, святе, чудодейственника и начало подвигов твоих за Христа, ихже доблественно совершил еси.
5. Мечем мужества твоего, доблемудре, разрекл еси мучителей коварства, прещения же и всякое на тя шатание, и змия лъстивомудреннаго главу сокрушил еси.
6. Словеса и деяния идольскую лесь обличая, привел еси ко Свету Трисолнечнаго Богочаляа многия никомедийцы, Пантелеимоне Богосветле.

Прокимен, глас 4:

Прокимен: Дивен Бог во святых Своих, Бог Израилев.

Стих: В церквах благословите Бога, Господа от источник Израилевых.

Апостол к Тимофею, зачало 292.

Брѣтїе: возмогай во бл҃гѣти, ѿже ѡ хрїстѣ іисѣ, и ѿже слышалъ єси ѿ мене многими свидѣтели, сїлѣ предаждь вѣрнымъ чловѣкомъ, ѿже доволни бѣдѣтъ и нынѣхъ надѣти. **Ты** ѡубо злопостраждѣ ѿкъ добръ воинъ іисъ хрїтовъ. **Никтоже** (во) воинъ бываа ѡблзѣтса къплани житѣйскими, да воєводѣ ѡгѡденъ бѣдетъ. **Аще** же и пострадаетъ кто, не вѣнчаетса, аще не законно мѣченъ бѣдетъ. **Трѣждающе**мса дѣлателю прѣжде подобаетъ ѿ плода вѣсїти. **Раздмѣй**, ѿже глаголю: да дастъ ѡубо тебѣ гдѣ раздмѣ ѡ всѣмъ. **Поминай** (гда) іиса хрїта воставшаго ѿ мѣртвыхъ, ѿ сѣмене дѣдова, по блговѣствованїю моему, въ неже злопостраждѣ даже до ѡузъ, ѿкъ злодѣй: но слово вѣїе не вѣжетса. **Сего** ради всѣ терплю избранныхъ ради, да и тїи спїте ѡдѣчатъ єже ѡ хрїстѣ іисѣ, со славою вѣчною.

Аллилуя, глас 2: Праведник, яко финикс процветет, и яко кедр, иже в Ливане, умножится.

Стих: Насаждени в дому Господни, во дворех Бога нашего процветут.

Евангелие от Иоанна, зачало 52.

Рече Господь: Сїа̑ заповѣдаю вамъ, да любите дрѹгъ дрѹга. **А**ще мїръ васъ ненавидитъ, вѣдите, ѿкѡ менє прѣжде васъ возненавидѣ: аще ѿ мїра бысте были, мїръ ѹбѡ своє любилъ бы: ѿкоже ѿ мїра нѣсте, но азъ избрѣхъ вы ѿ мїра, сегѡ ради ненавидитъ васъ мїръ. **П**оминайте слово, еже азъ рѣхъ вамъ: нѣсть рабъ болїи гѡспода своєгѡ: аще менє изгнаша, и васъ изженѹтъ: аще слово моє соблюдоша, и ваше соблюдѹтъ: но сїа̑ вса̑ творѣтъ вамъ за ѿмѡ моє, ѿкѡ не вѣдаѹтъ пославашаго мѡ. **А**ще не быхъ пришелъ и глаголю и мѡ, грѣхѡ не быша ѿмѣли: нѣ же вини не ѿмѹтъ ѡ грѣсѣ своємъ: ненавидѡи менє, и оца̑ моего ненавидитъ: аще дѣлъ не быхъ сотворилю въ нїхъ, ѿхже ѿнѣ никтоже сотвори, грѣхѡ не быша ѿмѣли: нѣ же и видѣша, и возненавидѣша менє и оца̑ моего: но да свѣдетсѡ слово, писанное въ законѣ ѿхъ, ѿкѡ возненавидѣша мѡ тѣне. **Е**гда же прїидетъ ѹтѣшитель, егѡже азъ послѡ вамъ ѿ оца̑, дѣхъ истины, ѿже ѿ оца̑ исхѡдитъ, той свидѣтелствуетъ ѡ мнѣ: и вы же свидѣтелствуете, ѿкѡ ѿсконї со мною естє. Сїа̑ глахъ вамъ, да не совлазнитєсѡ. **Ѿ** сонницѣ ижденѹтъ вы: но прїидетъ часъ, да всѡкъ, ѿже ѹвѣетъ вы, возмнїтсѡ слѣжѡ приносїти вѣдѣ:

Причащен: В память вечную:

МОЛИТВА

О, великий Христов угодниче и преславный целебниче, великомучениче Пантелеимоне! Душею на небеси Престолу Божию предстояй и Триипостасныя славы Его наслаждаяйся, телом же и ликом святым на земли в Божественных храмах почиваяй и данною Тебе благодатию различная источаяй чудеса, призри милостивным оком на предстоящая люди и честней твоей иконе умильно молящихся и просящих от тебе целебныя помощи и заступления. Простри ко Господу Богу нашему теплая своя молитвы и испроси душам нашим оставление согрешений. Се бо мы за беззакония наша не смеюще возвести очес наших к высоте Небесней, ниже вознести глас молебный к Его в Божестве непреступней славе, сердцем сокрушенным и духом смиренным тебе, ходатая милостива ко Владыце и молитвенника за ны, грешныя, призываем, яко ты приял еси благодать от Него недуги отгоняти и страсти исцеляти. Тебе убо просим: не презри нас, недостойных, молящихся тебе и твоя помощи требующих. Буди нам в печалех утешитель, в недужех лютых страждущим врач, напаствуемым скорый покровитель, очесем недугующим прозрения датель, ссушим и младенцем в скорбех готовейший предстатель и исцелитель. Исходатайтвуй всем вся, яже ко спасению полезная, яко да твоими ко Господу Богу молитвами получивши благодать и милость, прославим всех благих Источника и Дароподателя, Бога

Единаго в Троице Святей славимаго, Отца и Сына и Святаго Духа, ныне и присно
и во веки веков. **А**минь.